

INGEKOMEN 21 AUG. 1989

PROMER LUSTRO DI MUSEO HISTORICO ARUBANO DEN FORT ZOUTMAN/WILLEM III TOREN

Durante Siglo 18, e haf di Oranjestad a cuminza bira un punto importante den trafico comercial.

Na mesun tampo Aruba tabata ser bishita frecuentemente pa piratanan, kendenan ta bin horta articulonan di valor, e.o. cabay.

Como medio di defensa, Gobernador Lauffeur a laga construi un forti cu 4 cayon y cu tin un bon bista ariba lama. E forti a keda cla na aña 1796.

Pa motibo di falta di defensa na Oranjestad, hopi hende a bay biba na otro sitionan manera e.o. Ponton y Sividivi, pero despues cu e forti tabata ofrece seguridad y defensa, poco poco mas hende a bin biba den vecindario di e forti y e haf.

Durante e añanan 1816 te cu 1911, oficinanan di Gobierno tabata estableci den e forti.

E nomber Fort Zoutman a ser escogi na honor di e admiral hulandes Johan Arnold Zoutman, kende tabata un papel heroico durante e guerra hulandes-ingles. Gobernador Lauffeur tabata impresionado pa e heroismo di admiral Zoutman y a dicidi pa duna e forti e nomber "Fort Zoutman".

Na aña 1868 a construi e toren, na unda tabatatin e prome oloshi publico den Oranjestad. Tambe e toren tabata fungi como faro na unda tabata sende un lampi di kerosine. E lampi a ser sendi pa prome vez na aña 1869, ariba cumpleaños di Rey Willem III y pa e motibo aki a duna e toren e nomber "Willem III-Toren".

Como medio di proteccion, e forti atravez di añanan aperde su significacion, pe a yuda pa activa un cantidad di transaccionnan comercial den haf haciendo Oranjestad e capital di Aruba, centro di Gobernacion y un simbolo di progreso Arubano.

Atravez di añanan, tanto Fort Zoutman como Willem III-Toren lamentablemente a para bira un ruina y gracias na iniciativanan di Fundacion Centro Cultural Aruba un proyecto a keda entama na e Consejo Cultural di Reino pa logra fondonan pa restoracion monumentonan historico aki.

Trabownan di restauracion a inicia na aña 1974 y a tuma 11 aña di perseverancia y insistencia pa por a logra cu dia 23 di Augustus 1985 un forti

y un toren completamente restaura por a habri su portanan, den cual ta situa e museo Historico Arubano na unda parti di historia di Aruba y nos bieuwnan ta ser exhibi.

Dia 23 di Augustus 1989 e promer lustro di Museo Historico Arubano lo ser recorda cu ta alavez e promer lustro cu 2 gran monumento di nos identidad y patrimonio a keda conserva pa futuro generacionnan.

Durante ultimo 5 añanan, alrededor di 11.000... persona (tanto turista como local) a bishita Museo Historico Arubano.

Relaciona cu e hecho aki y como un gesto na comunidad Arubano, e portanan di Museo Historico Arubano lo ta habri gratuitamente pa tur bishitante, skolnan, gruponan etc., durante e siman di 21 te cu 25 di Augustus.

Dia 23 di Augustus 1989, lo ta un dia social na Museo Historico Arubano, na unda lo trece tur nos grandinan cu ta hospedando den e diferente casnan di anciano, pa pasa un dia agradable cu musica pa disfruta di pandushi y drikidek mientras nos bieuwnan por recorda nan juventud den tur logue tin den e museo.